



Jumat, 14 Juli 2023
Ogen: Matius 22:15-22



NGGALAR PAJAK



Sada paksa lit perbapan berkat ku kantor penggalaren pajak kendaraan bermotor. Bapa enda ndai lit piga-piga motorna. Motor si kujuma, motor ku tiga ras motorna ku gereja. Rembang bas wari e ndai nggo man galaren kerina pajak motor e. Kenca ia jumpa salah sada petugas pajak ndai ikiraina aseka kari penggalaren pajakna. Emaka merawa ia ban nggo kapna galangsa man galaren. Ibuatna Hp na emaka iteleponina beberena si kira-kira banci nampati engkurangi jumlah pajakna. Reh beberena ndai, iturihi beberena ndai jumlah kai saja si man galarena janah iturikenna memang ase kin man galaren pajak motor ndai. Perban mamang denga ate perbapan ndai nungkun ia man beberena. "o bebere mamana, adi bage kin galangna man galaren pajak e, me nggo bayak pemerintah, adi sa aku kal kal sila nggalar aturna la dalih, lang gia ku ja kin ban pemerintah e sen e kerina?"

Ntah mawen kita pe bage ka penungkunenta, khususna bas masa gundari e sebab enggo mbue ka rupa-rupa pajak man galarenta. Pajak 10% adi man kita i rumah makan, pajak Bumi dan Bangunan, pajak pendapatan ras sidebanna. Man kai pemerintah e nge sen pajak e, ntah bage nina ukurta nungkun-nungkun tapi la lit jababna. Sipasti secara kiniteken kita tek maka pemerintah eme persuruhen Tuhan guna ngaturken kita ibas nggeluh itengah-tengah jelma sideban. Kehadiren kalak Kristen arus maba perubahren ras kiniulin ijapa pe ia tading.

Sikap Tuhan Yesus jelas kerna sie, amin gia penungkunen kalak Parisi kerna pajak e guna ncubai Yesus. Pendapatna jelas, la menentang peraturan pemerintah, tapi la ncedai kubas kiniteken man Tuhan. Nggalar pajak tanda kita patuh iteruh otoritas pemerintah selaku persuruhen Tuhan. Mere persembahen man Tuhan emekap bagin kiniteken tanda kepatuhenta man Tuhan si mada geluhta. Biak Kristus teridah bas dirita adina kita maba simehuli, termasuk pe mehuli ibas penggalaren pajakta. Mari galari pajakta!!

☞ Kalak Kristen Tetap Jadi Usihen